



partii naleraq

UPA2016/131

Nunatsinni sulisinnaasut tamarmik atorneqalernissaat anguniarlugu, minnerunngitsumillu kalaallnik atorfilinnik qaffakkiartortitsinissamik anguniaqartumik, atorfilinnik pikkorissaasanerup kalaallinut iluaqutaanerusumik aaqqissuunneqarnissaanik oqallinnissamik siunnersuut.

(Inatsisartunut Ilaasortaq Hans Enoksen, Partii Naleraq)

Partii Naleqqami Nunatta Naalagaaffinngornissaa tunaartaralugu sulivugut.

Taama oqariarluta pingaaruteqartutut naqissuserusupparput nuna sunaluunniit ineriaortuarmat, aamma ilinniarsumassutsikkut, ineriaortornerullu inuiaqatigiinnut naleqqusarsimasuunissaa pingaaruteqarluinnarmat - killormuunngitsoq.

Ukiunilu qulikkaartuni ikittunnguani kingumut qiviarutta sukkatsikkiartuinnartumik ilinniagaqartut qujanartumik amerliartorsimapput, nalerarpullu ajunngilaq, amerliartortiinnassavagut. Tamannali ataqaqtigissaq, naammassippata nammineq nunaminni ilinniarsimasunik pisariaqartitsisumi atorfissaqartinneqartutut misigitinneqaaannaratik aamma atorfefqartitaanissaat. Tunngavilersuinerpullu pingasunik qulequtaqartissavarput:

1: Inuussutissarsiornermi sulisoqarnermilu piorsarsimassuseq, kulturi

Piorsarsimassuseq inuussutissarsiuutiniikkami sulisoqarnermiillunilu avissaartinneqarsinnaanngitsumik. Tamannalu uani danskit inuussutissarsiornermi aviisit pingarnerit ilaanni siornaanginnanguakkunni allagaq kalaallisuunngorlugu maani issuaaffigillatsiareernikuusatta uppernarsisippaa. Tassani immikkut saqqummersitami danskit tallimat ”nunarsuarmioqataasut” sammineqarput Sverigemi pisortatut sulisut, taakkulu angusaqarluartutut ineriaortitsinikuusutut isiginiarneqartartunut tunngatillugu ilanngullugu ikerasaq Øresund, Danmarkip Sverigellu akornaniittoq, kulturikkut qunnersuarmi imermik ulikaartutut taaneqarpoq.

Ilisimaarilluarlugu svenskit danskillu qanoq sutigut tamatigut imminnut qanitsigisut, taama inuussutissarsiornermi atorfinititsisarnermullu atatillugu inerniliisinjaappata Øresundimininnguarlu kulturikkut qunnersuaq imermik ulikkaartumik taasinnaappassuk, taava qanoq Atlantikup imartarujussua nunatta Danmarkillu akornaniittoq taajussagatsigu? Tassani ersersinneqarpoq qanoq kulturi – piorsarsimassuseq aamma inuussutissarsiornermi atorfinititsisarnermilu pingaaruteqarluinnaqqinnaartigisoq.

2: Suliffissaaleqineq

Ukiuni kingullerni suli kingulliutitaaneq kalaallimut malunnarnerulersimavoq aningaasameernerup kingunerisaanik suliffissaaleqisut amerlerujussuarmata. Killormullu avataaniit suliartortut ikiliartoratik. Tamanna naapertuutinngilaq aammalu akuersarneqarsinnaanani. Taamaattumik siornaak Partii Naleqqami siuttuuffigisatsinni inatsisartunut siunnersuummi piumasaqaatit ersarissut arlallit tunngavigalugit siunnersuusiorpugut partiit allat marluk suleqatigalugit. Ajornanngippallaarujuussuaqaaq avataaniit tikilluni suliffittaarnissamut, tamannalu ersarissumik sakkortusakkamik sinaakkusersortariaqarpoq. Tassami ukiorplassuarni "nunatsinnut matu qivertiinnarlugu" isaatitserujussuarnikuuvugut uffali nammineq nunaqqatigut suliffissaaleqillutik atugarliortut. Ullumilu siunnersuuterput immikkoortoq 85-itut oqluuserisassaq tassunga tunngarpiartoq aappassaaniissuarput, neriulluta akuerisaajumaartoq

3: Ilanniartitaaneq

Inuiaqatigiit tunngaviusumik ilinniarnissaminut allanut sanilliulluta periarfissarissaarpugut, aammalu ukiuni qulikkaartuni kingullerni sukkatsikkiartuinnartumik naammassisartut qujanartumik amerliartornikuullutik, taamaakkaluartorli naammassereerlutik nunatsinnut utertartut ajoraluartumik ikippallaqaat. Pissutsit tamakku ilorraap tungaanut saatittariaqarpagut. Kalaaleq nunaminut uteqqinnissamut kajumittariaqarpoq, aaqqissugaanitsigullu tamanna naapertuutinngippat taava kingusinaartinnata naleqqussaasariaqarpugut.

Taassuma ataanut aamma inissinneqarsinnaavoq sulisunik pikkorissaasarneq. Taanna kikkunnut sammitinneqassanersoq aammalu qanoq iluaqutaassuseqassanersoq sinaakkusersortariaqarparput. Ukiut 5-7 qaangiupput misissuisimanerit takutimmassuk atorfilittaq tikisitaq agguaqatigiisillugu qaammatini 18-nini taamaallaat maaniittartoq, tassalu ukiup aappaa avillugu. Massakkullu qaammatit taakku 13-iinnanngornikuupput. Tikisitarlu tassaakkajuttarpoq ilinniarsimalluni naammasserlaaq misilittagaqanngitsoq, amerlanerpaartigut nunatsinniissimanngisaannartoq taamaattumik kulturitsinnik nunatsinnillu ilisimasaqanngittoq. Qaammatini 13-nini 6-it siullit atortarpai pissutsinut iseriartornermigut, tassami suliffik nutaajuinnarani silarsuaali tamarmi nutaajusarpoq, pissutsit nutaaqqinnaat, inuiaat nutaaruinnaat ilisimasaqarfigingilluinnakkani. Taamaattumik minnerpaamik aatsaat ukiup affaa qaangiukkaangat taanna tikisitaq inuiaqatigiinnut tunniussaqalerluni aallartittarpoq, maani annermik nunaqvissunik ilinniartinneqareerluni. taava ukiup affaasa tullii inuiaqatigiinnut tunniussai annikippallaamik annertusiartorusartarput. Qaammatit naliginnaasumik 3-sut arfinillillu sioqqullugit soraarniutissani tunniuttartussaagamikku angerlaruni suliffittaassani ujartulereertaramiuk annertunerusumik tunniusseqqitarani. Pisortani atorfilitat annermik taarserarnerujussuat inuiaqatigiinnut qaammaasakkut misilittakkatigullu minnerpaamilluunniit iluaqutaanatik killormuanit ajoqutaapput. Tassalu uani ersersinneqarpoq suli uagutsinnut iluaqutaanngittumik pikkorissartittuarigut.

Akuersarneqarsinnaanngilluinnartumik qaammaasat misilitakkallu nunatsinniit kuussuartut supisutut ilillutik ukiorplassuarni aniatippagut, qangatullu iliortarneq tassunga killeqartariaqalerpoq. Qaammaasat misilittagarnerlu pissaaneqarfipput inuiaqatigiillu tassa massakkut iluaqutigertariaqalerpaat, maani nunatsinni inuinut iluaqutaasussanngorlugit annertusiartortillugit!

Taamaattumik massakkut pimoorullugu qaammaasat misilitakkallu maani annertusiartornissaat siunertaralugu inuiattut suut naleqartitatut tunngavigissanerlugit aalajangersaariarluta aaqqissugaanerput, aamma atorfilittaqarnikkut, inissittariaqalerparput. Tassa naammaleqaaq, immitsinnut uukapaasiariunnaarniarta, atanguli iliuutsigut oqaatigisartagatsinnut naapertuutumik timitalersulertigit.

Tassanilu aamma pingaaruteqartutut isoralugu taaneqartariaqarpoq atorfissarsiuussinermi "ujaarlertartut" nunatta avataaneersut kisiisa atorneqarnerujussuata qularnannngitsumik kingunerisaanik nunatta avataaneersuinnangajannik pisortanik atorfinititsisaqattaarnerput tassunga killeqartariaqarpoq. Qujanartumillu tamannarpiaq siunertaralugu aalajagiiffigisassatut siunnersuutit arlallit upernaaq manna sammivagut taperserujussuakkatsinnik.

Uteqattaaariuassuugullu paasineqalernissaa neriuutigingatsigu - pinngitsoornata aamma ilanngullugu taaqqikkusupparput kalaallit ukiorpassuarni aqumiut atorumeqannginnerujussuat, asu atorniartigit! Qaammaasat misilitakkallu aamma uani pillugit.

Eqqaqqillarput inuaat kalaallit taamannak timalersuigunik angussavaat qaammaasat misilitakkallu inuaat kalaallit iluaqutigilissavaat, annaasassaqanngilagut, aatsaat naapertuutinngitsumigaasiit iliuuseqarutta anguniagarpus suli ungasininngortussaavoq, tamanna Naalakkersuisut anguniarpaat? Partii naleqqap tamanna anguniangilluaasarpaat.

Partii Naleqqap anguniarpaa qaammaasat misilitakkallu uagut kiisami iluaqutigilissagingut, taamaattumik tunngavilersuutigut qulaani tunngavigalugit Hans Enoksen, Partii Naleqqameersup oqallissaarutaa paasilluarlugu siunertaanik taperserparput, kalaallit sapinngittut aamma pisinnaasut tatigingatsigit, ilissimi?

Sorpasuartigut kinnganikorsiortitaanerput nammineq nunatsinni naammaleqaaq, allaat ippassaani avaleraasartoortassani agguassineremi akuersaerneqarsinnaanngittumik takoqqipparput nunatta avataaneersut tuniorariarlugit nunaqavissunik sinnikunik paggatitsigatta.

Oqaatsigut timitaliisarnigullu imminnut ataqtigittariaqalerput, taamaattumik makkut ilanngullugit aaqqiivigisariaqalerput:

- Pisortat tamakkiisumik ilaannakortumillu pigisaanni Siulersuisuni ilaasortanik pisortanillu ikkussuisarnerit
- Suliffissaaleqisut 3% angugaangagu avataaniit tikisitsineq unitsinneqartalissooq, atorfiit inuunermik naleqarsinnaasut pinnagit
- Inuuusuttunut immikkut iliuuseqartoqartariaqarpoq

Naggataarutigalugu Partii Naleqqamiit Sume-kut taalliaat 1974 sanaaq tigulaariffigissavarput sulili ullutsinni amiilaarnaannartumik amerlaqaluta ilisarisinnaasarput:

Takornartaq

Takornartatut sulisarlutit

Takornartanik quleqarputit

Takornartatut pineqarlutit

Illa qauguuna Naalakkersuisut kalaaleq nammineq nunamini taama misigiunnaarnissaa naammassillugu aaqqinniaraat? Taama oqaaseqarluta siunnersuuteqartoq Hans Enoksen oqaaseqaallu tamakkiisumik taperserparput.

Naggaterpiaatigullu ippassaani issittumik takornariaqarnermi guidetut 15-t naammasserlaat pilluaqqutigalugit Naalakkersuisut kaammattussavagut sulilernissaannik qulakkeerinninniaqqullugit.

Qujanaq